

MOCIÓN PARA A CREACIÓN DE LUGARES DE ACOLLIDA A PERSOAS REFUXIADAS NOS NÚCLEOS RURAIS GALEGOS

Ángel García Seoane, como voceiro do Grupo Provincial da Alternativa dos Veciños, ao abeiro do disposto no Regulamento Orgánico da Deputación da Coruña, presenta para a súa aprobación polo Pleno provincial esta moción en base á seguinte:

EXPOSICIÓN DE MOTIVOS

As guerras orixinadas polos Gobernos de Occidente en países como Iraq, Siria, Afganistán, Libia ou Iemen teñen provocado a maior crise de refuxiados desde a Segunda Guerra Mundial. Hai máis de dous anos, este Grupo provincial achegou unha proposta real para dar unha saída, na medida das posibilidades desta Institución, ao drama de moitas familias que foxen desas guerras, percorrendo milleiros de quilómetros sen rumbo fixo coa fin de conseguir algo de paz lonxe das bombas. Ante a abstención anunciada entón polos grupos PP, PSOE, BNG e Compostela Aberta, se instou a deixar o asunto sobre a mesa **co compromiso de abrir os foros de debate necesarios para abordar esta problemática.**

Dous anos despois seguimos coa mesma problemática e con poucas solucións. Segundo datos do informe para 2018 da Comisión Española de Axuda ao Refuxio, só en 2017, 31.120 persoas solicitaron protección internacional en España , aproximadamente a poboación total do Concello de Culleredo. **Desde que a Unión Europea lle asignara a España unha cuota de 19.449 persoas, só se lle concedeu o estatuto de refuxiadas ao 12,85 %.** Neste sentido o Tribunal Supremo acaba de condenar ao Estado español polo incumprimento desa cuota a instancias dun contencioso-administrativo interposto pola asociación *Stop Mare Mortum*. Este fallo xudicial demostra o fracaso dos Gobernos coas políticas de acollida e refuxio e obriga a España a continuar coa tramitación do 87,15 % das solicitudes de asilo restantes por ser **o acordo coa Unión Europea en 2015 “vinculante e obrigatorio”**. E o primeiro tribunal nacional en condenar ao seu país por incumprir os compromisos de reubicación dos asilados acordados pola UE en 2015. Estamos, pois, nun momento que require tomar medidas efectivas desde xa.

Os políticos realmente comprometidos estamos de acordo en que a solución principal está en facilitar que os pobos non teñan que saír dos seus países. En que se poidan sentir seguros nos seus fogares e, en caso de ter que fuxir, poidan retornar a eles máis adiante. Pero a realidade indícanos que estes centos de milleiros de persoas seguen escapando dunha guerra infinita que lles deixa sen casas, sen familia, sen terra e sen traballo. Que os anula como seres humanos e lles quita o fogar ao que quixerían volver.

Os países que provocamos esas guerras temos a obriga de, ademais de deixar de bombardear, dar refuxio e acollida aos que foxen do terror e da metralla. Con política, non con xestos cara a galería e demagogia. Porque a chegada do barco *Aquarius* ao porto de Valencia foi un movemento admirable e hai que recoñecelo, así como hai que condenar que Italia lle negase porto seguro. Pero tamén hai que sinalar que non podemos seguir armando a países como Arabia Saudita. Na política sobra hipocrisía e faltan actos e solucións reais.

No ano 2017, segundo datos da Organización Internacional para as Migracións (OIM), 3.116 persoas perderon a vida mentres trataban de chegar a Europa a través do mar, entre eles 170 nenos. Pero quen de nós coñece algunha desas 3.000 historias? Ninguén. Non obstante, temos cada día un novo perfil monográfico de cada un dos 12 nenos que, por sorte, foron rescatados na cova de Tailandia. Abrindo todos os diarios e telexornais. Creando unha axenda que desvía a atención sobre unha realidade tamén terrible e máis próxima do que semella: **o Mediterráneo é a nosa gran cova, onde a maior parte dos nenos non son rescatados**. Onde milleiros afogan coas súa historias.

En definitiva, temos un problema coas políticas de asilo ao cal non se lle están poñendo solucións. En Galicia contamos con outro terrible problema relacionado co despoboamento e cunha crise demográfica insostible que tamén precisa de solucións. Esta circunstancia ten que ser un toque de atención para Institucións como esta, que brinda apoio a 93 concellos.

Por todo o exposto, e co ánimo de buscar unha solución real para tantas familias en desgraza a través de políticas de asilo dentro das fronteiras da Unión Europea e tendo en conta a necesidade imperiosa de aplicar medidas contra o despoboamento do rural galego, solicítase ao Pleno provincial a aprobación dos seguintes

ACORDOS

1. Instar á Xunta de Galicia para que, en colaboración cos concellos e a Deputación, elaboren un Plan integral de inclusión para as persoas refuxiadas que ademais da cuestión habitacional, ofrezca solucións a través do acceso a servizos básicos; da adquisición de terreos e vivendas abandonadas no rural polas numerosas renuncias a herdar dos lexitimarios; e da integración laboral, sociocultural e formativa no ámbito en que se desenvolvan.
2. Requirir da FEGAMP a colaboración necesaria para a creación dunha listaxe de vilas e aldeas con problemas de despoboamento e abandono de propiedades para elaborar un mapa que comprenda todas estas zonas tanto na provincia da Coruña como, por extensión, no resto de Galicia, onde se poida aplicar o Plan de inclusión para as persoas refuxiadas.
3. Incluír este asunto na orde do día da próxima sesión ordinaria da Comisión Informativa de Benestar Social, Educación e Políticas de Igualdade de Xénero.
4. Poñer en coñecemento do resto das Administracións públicas (estatal, autonómica e locais) e do Fondo Galego de Cooperación como axencia municipal de cooperación galega os acordos adoptados polo Pleno a este respecto para engadir as aportacións que estimen oportunas.

En A Coruña, a 18 de xullo de 2018